

SPORAZUM IZMEĐU

MEĐUNARODNE KOMISIJE ZA NESTALA LICA

I

SAVJETA MINISTARA BOSNE I HERCEGOVINE

MEĐUNARODNA KOMISIJA ZA NESTALA LICA (u daljem tekstu ICMP), s jedne strane, i SAVJET MINISTARA BOSNE I HERCEGOVINE, s druge strane,

UZIMAJUĆI U OBZIR ostvaren rad ICMP-a na pružanju pomoći porodicama nestalih lica i njihov doprinos u pronalasku odgovora o sudbini nestalih lica,

ŽELEĆI odrediti privilegije, imunitete i pogodnosti koje bi uživao ICMP, članovi i osoblje, a sve da bi se, što je više moguće, olakšao rad ICMP-a,

su se dogovorili slijedeće:

ČLAN 1. – STATUS ICMP-a

Status ICMP-a biće jednak statusu međuvladinih organizacija.

ČLAN 2. – STATUS PRAVNOG LICA

ICMP će imati status pravnog lica. Bosna i Hercegovina priznaje da ICMP ima sposobnost da ugovara obaveze, da pokreće sudske postupke i ostvaruje prava, kao i da ostvari i rasporedi pokretnu i nepokretnu imovinu.

ČLAN 3. – IMUNITET ICMP-A, NJENOG VLASNIŠTVA I IMOVINE

ICMP, njeno vlasništvo i imovina će uživati puni imunitet od svakog oblika pravnog ili upravnog postupka, izuzev u određenom slučaju kada se ICMP isključivo odrekne svog imuniteta.

ČLAN 4. – NEPOVREDIVOST PROSTORIJA, VLASNIŠTVA I IMOVINE ICMP-A

Prostorije ICMP-a su nepovredive. Vlasništvo i imovina ICMP-a su imuni na pretres, zapljenu, izvršenje, eksproprijaciju i svaki drugi oblik ometanja, bilo od strane izvršnog, sudskog, upravnog ili zakonodavnog djelovanja.

ČLAN 5. – IZVORI FINANSIRANJA ICMP-a

ICMP ima pravo da zadrži domaću ili stranu valutu i drugu finansijsku imovinu, da rukovodi računima i prenosi sredstva u drugu valutu i na nju se neće odnositi zakoni i odredbe koje uređuju oblast devizne kontrole i srodna pitanja.

ČLAN 6. – POREZ I NAKNADE

ICMP može uvoziti dobra potrebna za svoju zvaničnu upotrebu oslobođena bilo kakvih obaveza, poreza ili ograničenja, kao i nabavljati domaće proizvode, dobra i usluge bez plaćanja poreza ili obaveza bilo koje vrste.

Ministartvo vanjskih poslova Bosne i Hercegovine će obezbijediti dokumentaciju i razviti procedure potrebne za sva izuzeća bez odlaganja.

ČLAN 7. – STATUS MEĐUNARODNOG OSOBLJA ICMP-A

1. U slučaju da nisu državljani Bosne i Hercegovine, direktor ICMP-a i njegov zamjenik i njihove porodice uživaju iste privilegije i imunitet koji imaju diplomatski agenti i njihove porodice u skladu sa Bečkom konvencijom o diplomatskim odnosima. Podrazumijeva se da uživaju imunitet od zapljene ličnog prtljaga.

2. U slučaju da nisu državljani Bosne i Hercegovine, drugi članovi osoblja ICMP-a i njihove porodice uživaju iste privilegije i imunitet koji imaju članovi administrativnog i tehničkog osoblja diplomatskih misija i njihove porodice u skladu sa Bečkom konvencijom o diplomatskim odnosima.

3. Takođe, međunarodno osoblje ICMP-a i njihove porodice :

- a) su oslobođene imigracionih ograničenja i stranih registracija.
- b) imaju pravo da prodaju ličnu imovinu pod istim uslovima kao i lica istog položaja na državnim misijama.

4. Pored poreskih olakšica i izuzeća koje uživaju u skladu sa Bečkom konvencijom o diplomatskim odnosima, podrazumijeva se da je međunarodno osoblje ICMP-a izuzeto od svih poreza na plate i druge dohotke od ICMP-a ili za usluge izdate ICMP-u.

ČLAN 8. – ČLANOVI, SAVJETNICI I EKSPERTI ICMP-A NA PRIVREMENOJ MISIJI

Međunarodni članovi ICMP-a na privremenoj misiji u Bosni i Hercegovini za ICMP i članovi njihovih porodica u pratnji, uživaju iste privilegije i imunitet kao i diplomatski agenti i njihove porodice u skladu sa Bečkom konvencijom o diplomatskim odnosima, kao i zaštitu navedenu članom 7, stav 3. (a) i stav 4.

Međunarodni savjetnici ICMP-a kao i stručnjaci na misiji za ICMP u Bosni i Hercegovini, i članovi njihovih porodica u pratnji, uživaju iste privilegije i imunitet koji imaju članovi administrativnog i tehničkog osoblja diplomatskih misija i njihove porodice u skladu sa Bečkom konvencijom o diplomatskim odnosima, kao i zaštitu navedenu članom 7. stav 3. tačka (a) i stav 4.

ČLAN 9. – LOKALNO OSOBLJE ICMP-A

Lokalno osoblje ICMP-a neće se smatrati krivično niti građanski odgovornim za bilo koje djelo koje učine u vršenju službene dužnosti kao zaposlenih u ICMP-u i izuzeti su iz nacionalne službe i drugih vojnih obaveza.

ČLAN 10. – ODRICANJE IMUNITETA

Privilegije i imunitet su odobreni licima navedenim u članu 7, 8. i 9. u interesu ICMP-a, a ne za ličnu korist pojedinca. Direktor ICMP-a ima ovlast da ukine imunitet bilo kojem članu osoblja ICMP-a ili stručnjacima na misiji za ICMP. U slučaju direktora, člana osoblja ili savjetnika ICMP-a, predsjedavajući ICMP-a ima ovlast da ukine imunitet. Direktor ima pravo i obavezu da ukine imunitet u bilo kojem slučaju kada bi, po njegovom mišljenju, imunitet ometao djelovanje pravosuđa, a imunitet može biti ukinut bez narušavanja interesa ICMP-a. U slučaju predsjedavajućeg, članovi (povjerenici) ICMP-a imaju ovlast da ukinu imunitet.

Direktor ima ovlast da ukine imunitet ICMP-a, njenog vlasništva ili arhive.

ČLAN 11. – IDENTIFIKACIONI DOKUMENTI I GRB

1. Ministarstvo vanjskih poslova Bosne i Hercegovine obezbjeđuje međunarodnom osoblju ICMP-a identifikaciona dokumenta propisana za diplomatske agente u Bosni i Hercegovini.

2. ICMP može, bez ograničenja ili naknade, izabrati grb i prikazati ga u svojim prostorijama, na vozilima ili opremi.

ČLAN 12. – SARADNJA SA NADLEŽNIM VLASTIMA

ICMP u svakom trenutku saraduje sa odgovarajućim nadležnim vlastima Bosne i Hercegovine kako bi se olakšalo pravilno provođenje pravde, osiguralo poštivanje policijskih propisa i sprečavale pojave zloupotrebe privilegija, imuniteta i olakšica spomenutih u ovom sporazumu.

ČLAN 13. – SLOBODA KRETANJA

1. Članovi, osoblje, savjetnici i eksperti na misiji za ICMP, zajedno sa svojim vozilima i drugom opremom uživaju nesmetanu slobodu kretanja i prolaska kroz Bosnu i Hercegovinu radi jačanja svojih odgovornosti.

2. Članovi, osoblje, savjetnici i eksperti na misiji za ICMP mogu koristiti aerodrome, puteve i luke u Bosni i Hercegovini bez plaćanja naknada, obaveza ili cestarina.

3. Vozačke dozvole izdate članovima, međunarodnom osoblju, savjetnicima ili ekspertima na misiji za ICMP od strane njihovih odgovarajućih državnih tijela su prepoznata i priznata kao valjana bez lokalnih administrativnih procedura, naknada i taksi. Motorna vozila kojima se ICMP služi, mogu koristiti strane registarske tablice ili diplomatske registarske tablice koje im je obezbijedilo Ministarstvo vanjskih poslova Bosne i Hercegovine. ICMP će ugovoriti odgovarajuće osiguranje od odgovornosti za štetu trećim licima koju pričinje svojim vozilima.

ČLAN 14. – KOMUNIKACIJA

ICMP je slobodan da koristi, za zvaničnu upotrebu i bez ometanja, sva sredstva komunikacije koja smatra najprikladnijim za svoje kontakte unutar i van Bosne i Hercegovine. ICMP može koristiti VHF/HF radio uređaj drugih organizacija koje djeluju u državi.

ČLAN 15. – DRUGE ODREDBE

1. Ovaj sporazum stupa na snagu potpisivanjem obe strane.

2. Odredbe ovog sporazuma mogu biti promijenjene u bilo koje doba dogovorom između obe strane.

3. Savjet ministara Bosne i Hercegovine i ICMP mogu otkazati ovaj sporazum obavještanjem druge strane najmanje šest mjeseci ranije, nakon čega sadašnji dogovor prestaje da važi.

4. Bilo koje razlike vezane za primjenu i tumačenje sadašnjeg dogovora koje ne mogu biti riješene pregovorima se upućuju na nepristrasnog arbitra o kojem su se obe strane složile.

ČLAN 16. - ORIGINAL I MJESTO ČUVANJA

Postojeći dogovor se sastoji od duplikata originala na engleskom jeziku.

U prisustvu svjedoka, stranke su potpisale ovaj sporazum:

Sarajevo, 26. April 1998. godine

Robert J. Dole

Jadranko Prlić

Za MEĐUNARODNU
KOMISIJU ZA NESTALA LICA

Za SAVJET MINISTARA
BOSNE I HERCEGOVINE